

TE TOA TAKITINI

Registered at the G.P.O. as a Newspaper.

Te Utu mo te Pepa 6/6 i te tau.

Me penei nga reta "*Te Toa Takitini*," Box 300, Hastings.

2

TE TOA TAKITINI.

Tihema 1. 1923.

TE MIHANA WHAKAORA.

KEI te mau tonu te manaakitanga a te Atua ki nga Mihana Whakaora e whakahaeretia nei e Te Hikihana. Ko te purapura o te ora a te Atua e tiria haeretia nei, kei te tipu tonu i roto i te tinana i te wairua o te hunga i tae nei ki nga Mihana. I whakaatu ano hoki a Te Hikihana ko etahi e ora whakarere, ko te muinga ano ia ka ata piki haere mai te ora. Ko etahi tena e tae ki te toru ki te wha marama, katahi ano ka tino whiwhi ki nga manaakitanga a te Atua. Kei te turoro tonu te ahuatanga mo tona mate, ara kei te ahua tonu o tona wairua. Ka tuku whakarere atu ia i tona wairua ki te Atua, ka tere ano te tau iho o nga manaakitanga a te Atua ki tona tinana.

Kia makuku te purapura, ka pai ai te tipu. Ko te purapura a te Atua e tiria nei, me whakamakuku *ki te Ripeneta, ki te Whakapono, ki te Inoi.*

Kia mahara ano hoki nga turoro kua whakawhiwhia nei ki nga manaakitanga mo te tinana mo te wairua ranei, kia whai mahi koutou ki te Atua. Kaua hei waiho mangere te manaakitanga a te Atua. Whakamahia hei honore hei kororia mo te Atua.

Kia pai to whiriwhiri i te whakahoki mo te patai nei: He aha koe i hiahia ai kia whakaorangia koe? Kaore ma nga huarahi pohehe, engari "*kia whai mahi ai koe ki te Atua.*"

MIHANA KI ROTORUA.

KUA tuturu te ra mo te Mihana ki Rotorua hei te 18 me te 19 o Tihema nei. Ko te Mihana whakamutunga tenei a Te Hikihana ki Nu Tireni nei. Engari ko nga whaka-haere o te Mihana Whakaora ka mau tonu i Nu Tireni nei. Ko te haere mai a Te Hikihana he whakahon i tenei mana e moe nei i reto i te Hahi. Kaore te mana e riro i a Te Hikihana. Ko te mana no te Atua, ko te kai-pupuri i taua mana ko te Hahi o te Karaiti. No reira kaua hei pouri te hunga kua kore i tae ki nga Mihana a Te Hikihana. Kia mutu te hui a te Pihopa me nga Minita i te 11 o nga ra o Tihema, ka rangona ai nga tangata me nga parihia e whakahaeretia ai nga karakia whakaora turoro. Ko te Mihana i Rotorua ka whakahaeretia ki te whare-karakia o nga Maori i Ohinemutu. E 600 nga turoro kua whiwhi ki o